



Selasa, 23 Agustus 2022
Ogen: Heber 11:1-31



Ngumban Kiniteken Si Arah Lebe



Sada kata si lit i bas diri pahlawan e me 'pengorbanen.' Adi siperdiateken perjuangenna guna mpertahanken negara e me nggit nadingken keluarga, lawes erperang mpelawes kerina penjajah. Kesahna jadi taruhen e pe la kebiaren man bana. Lit semboyan si erbahansa ia semangat nerusken perjuangan e e me, 'hidup atau mati.' Semboyan e lalap erbekas bas pushuna, erbahansa erburak-burak ukurna erjuang. Patut kal ngerana presiden Sukarno man banta nina, *'bangsa yang besar adalah bangsa yang bisa menghargai jasa pahlawannya.'* Enda sada kalimat si ngajuk kita tetap ngergaken jasa-jasa pahlawan si enggo erjuang guna kemerdekan bangsanta.

I bas pustaka pe tersurat gelar-gelar pahlawan iman si enggo encidahken kepatuhenna man Dibata alu ndalanken kai si iperintahkenNa. I bas ndalanken kata Dibata e, melala si arus ikorbankenna subuk erga diri, waktu, tenaga, keluarga, ras ertana. Abram tupung ia ngikutken pendilo Tuhan, itadingkenna orangtuana si sedekah enda numpak-numpak ia, itadingkenna erta orangtuana, sedekah enda e erbahan ia meherga i bas kuta, nggit ia jadi perlajang i kuta kalak, arusna ndai ikutana ia jadi tuan taneh. Tupung ipindo Tuhan gelah ipersembahkenna anakna Isak, la ia nogan. Aminna sada e denga ngenca anakna, si enggo ndekah itimaina. Nuh nggit erbahan kapal I datas deleng, aminna melala kalak si nokoh man bana. Perjuangenna erbahan kapal e labo mesunah, mpepulung kayu-kayu kerangen ras iangkat ku das deleng. Majekken peranca-peranca guna erbahan kapal, nikapken waktu ras tenagana. Tapi kai siibahanna e maba keterkelinen man isi jabuna.

Pahlawan nasional ras pahlawan iman perlu kal iergaken, iusih cara geluhna ras iteladani pengorbanenna. Labo sia-sia kai si enggo ibahnna adi kerina kita ngikutkensa.